

Pa promer bez Arubiano ta dirigi hospital

Dr. John Leo Director di Hospital

ORANJESTAD (AAN)- Entrante 1 September 1988 Dr. John R. Leo a drenta servicio di e Stichting Ziekenverpleging Aruba como Director di Dr. Horacio E. Oduber Hospital. E cirujano, Dr. Leo ta bira asina e prome Arubiano encarga cu e maneho di e Hospital di Aruba.

Dr. Leo a nace 6 Januari 1937 na Aruba, unda el a cuminsa studia y caba e 3 añanan di H.B.S.-B na St. Dominicus College.

Na 1952 el a biaha pa Hulanda unda dos año despues el a obtene su H.B.S.-B diploma na St. Canisius College di Nijmegen. Na e Universidad Catolico di Nijmegen John Leo a gradua como docter di cas.

Despues el a bolbe na su pais natal, unda el a drenta servicio di Gobierno como docter den servicio general. Un año despues el a bolbe biaha pa Hulanda, unda el a sigui su entrenamiento como cirujano cerca e ya fayeci Profesor Dr. J.F. Nuboer na e Hospital Academico di Utrecht.

Di 1967 te 1969 e tabata research-fellow na e departamentu di transplantacion na e Colegio Medico di Virginia, Richmond VA, U.S.A.

Na 1970 el a worde inscribi den e Registro Hulandes di Specialistanan. na e mesun año Dr. Leo a bira cirujano di transplantacion na e Hospital Academico di Utrecht.

Un año despues el a bay traha na e Hospital Westeinde na Den Haag, unda año 1977 el a worde nombra como Hefe di e

Departamento di Cirujia na e Hospital Westeinde di Den Haag, unda el tabata traha como cirujano di ader y thorax. Tambe e tabata cirujano Instructor A.

Cu funcionnan aparte Dr. Leo a ocupa entre otro e presidencia di e staf medico di e Hospital na Den Haag, tabata miembro di e Comision Medica Audit di e Comision Regional di Educacion di leiden, di e Asociacion di Medicina, di e Asociacion

Hulandes di Cirujia di ader mientras cu e tabata tambe Secretario di e Stichting Bijscholing Stomazorg Verpleegkundigen.

Durante su carera Dr. Leo a pone ariba su nomber diferente publicacion y presentacionnan, entre otro ariba e tereno di transplantacion di rion y cirujia di ader.

Dr. Leo ta casa cu T.W.M. van Boxtel y tin un yiu homber, cu ta gradua pronto como dentista y dos yiu muher.